



Bosna i Hercegovina
Federacija Bosne i Hercegovine
Kanton Sarajevo
OPĆINA VOGOŠĆA
OPĆINSKI NAČELNIK



Vogošća, ul. Jošanička br. 80, tel: 00387 33 586-411

P R A V I L N I K

ZA DODJELU NOVČANIH POTICAJA ZA KUPOVINU NOVIH PLASTENIKA

Vogošća, juni 2026. godine

Na osnovu člana 15. Zakona o principima lokalne samouprave u Federaciji Bosne i Hercegovine ("Službene novine Federacije Bosne i Hercegovine", br.49/06 i 51/09) i čl. 71. i 125. Statuta Općine Vogošća „Službene novine Kantona Sarajevo“, broj 27/14 - Prečišćeni tekst, 14/15, 9/20 i 23/24), člana 16. Odluke o izvršavanju Budžeta Općine Vogošće za 2026. godinu („Službene novine Kantona Sarajevo“, broj 2/26) i Odluka onačinu primjene smjernica o minimalnim standardima dodjele budžetskih sredstava putem transfera i subvencija u Federaciji Bosne i Hercegovine broj: 02-02-575/25 od 15.04.2025. godine, Općinski načelnik donosi:

PRAVILNIK ZA DODJELU NOVČANIH POTICAJA ZA KUPOVINU NOVIH PLASTENIKA

I OPĆE ODREDBE

Član 1. (Predmet)

Ovim Pravilnikom se uređuju uslovi i postupak za dodjelu novčanih poticaja za kupovinu novih plastenika, a koja su planirana u Budžetu Općine Vogošća (u daljem tekstu: Općina).

Član 2. (Namjena korištenja sredstava)

Planirana finansijska sredstva, u skladu sa ovim Pravilnikom namijenjena su isključivo za nabavku novih plastenika.

Član 3. (Rodno značenje izraza)

Izrazi koji se koriste u ovom Pravilniku, a koji imaju rodno značenje, bez obzira jesu li korišteni u muškom ili ženskom rodu, obuhvataju na jednak način muški i ženski rod.

II USLOVI I NAČIN DODJELE SREDSTVA

Član 4. (Uslovi za ostvarivanje prava)

Pravo na dodjelu novčanih poticaja za kupovinu novih plastenika mogu ostvariti kandidati pod sljedećim uslovima:

- a) da imaju prebivalište na području općine Vogošća;
- b) da su vlasnici ili posjednici zemljište pogodno za plasteničku proizvodnju, ili da je korisnik zemljišta čiji je vlasnik član prvog ili drugog nasljednog reda (bračni partner, djeca, roditelji, braća i sestre);
- c) da je podnosilac zahtjeva upisan u RPG ili RK (Registar poljoprivrednih gazdinstava i Registar klijenata), kod nadležne općinske Službe i da je izvršeno ažuriranje podataka u tekućoj godini;
- d) da podnosilac zahtjeva u trenutku predaje zahtjeva na javni poziv izvršio/la kupovinu i instaliranje plastenika (neovisno o kvadraturi plastenika - 50 m² ili više);

- e) da će vlasnik kupljenog plastenika isti zadržati u vlasništvu najmanje tri godine od dana ostvarenog poticaja za isti;
- f) dodatni uslovi će biti definisani Javnim pozivom.

Član 5. (Javni poziv)

- (1) Sredstva za podršku aktivnostima iz člana 1. ovog Pravilnika dodjeljivat će se na osnovu podnesenih zahtjeva, a u skladu sa objavljenim javnim pozivom.
- (2) Javni poziv se objavljuje na web stranici Općine i ostaje otvoren 25 dana od dana objavljivanja.
- (3) Zahtjevi za sufinansiranje dostavljaju se službi nadležnoj za oblast poljoprivrede (u daljem tekstu: Služba) preporučeno putem pošte ili putem protokola.

Član 6. (Podnošenje potrebne dokumentacije)

Kandidat koji želi ostvariti pravo na refundaciju troškova za nabavku novih plastenika dužan je dostaviti dokumentaciju kojom dokazuje ispunjavanje uslova, u originalu ili ovjerenim kopijama, i to:

- a) Zahtjev za dodjelu sredstava (potpisan od podnosioca);
- b) Potvrdu o upisu u Registar poljoprivrednih gazdinstava (RPG) ili Registar klijenata (RK) izdati u tekućoj godini za koju se aplicira;
- c) Dokaz o vlasništvu nad parcelom koja se namjerava koristiti za instaliranje plastenika (ZK izvadak, Posjedovni listi, Ugovor o korištenju zemljišta bez naknade i dr.),
- d) Dokaz da je korisnik zemljišta član prvog ili drugog nasljednog reda (Izvod iz matične knjige vječanin, Izvod iz matične knjige rođenih, Izvod iz matične knjige umrlih i dr.),
- e) Dokaz o kupovini plastenika (Faktura / specifikacija o kupovini i montaži plastenika na ime kandidata sa dokazom o uplati istog - obavezan fiskalni račun) .
- f) Izjava kandidata da u posljednje tri godine nije ostvario pravo na donaciju, dodjelu ili sufinansiranje nabavke plastenika od Općine, ministarstava, humanitarnih i drugih organizacija,
- g) Izjava kandidata da će kupljeni platenik zadržati u vlasništvu najmanje tri godine od dana ostvarenog poticaja za isti,
- h) Potvrda o otvorenom računu kod banke,
- i) Izjava o davanju saglasnosti za obradu ličnih podataka.

Član 7. (Način provođenja postupka)

- (1) Ocjenu i pregled prispjelih prijava, evidentiranje kandidata koji ispunjavaju uslove iz Javnog poziva, obavljanje uviđaja na licu mjesta, sačinjavanje liste krajnjih korisnika, te dostavljanje iste Općinskom načelniku vršit će Komisija za odabir korisnika (tri člana) koju imenuje Općinski načelnik.
- (2) Saglasnost na predloženu rang listu kandidata daje Općinski načelnik na prijedlog Komisije za odabir korisnika za kupovinu novih plastenika.
- (3) Korisnici će biti obavješteni o rezultatima javnog poziva u roku od 30 dana od dana zatvaranja istog.
- (4) Nakon obrade prijava i formiranja liste korisnika, odobrena sredstva će biti uplaćena na račune korisnika putem nadležne Službe za finansije.
- (5) Kandidati koji ne ostvare novčani poticaj će biti obaviješteni pismenim putem.

III FINANSIRANJE

Član 8. (Iznos sredstava)

- (1) Iznos novčane podrške za kupovinu novih plastenika će biti utvrđen shodno visini raspoloživog Budžeta namjenjenog za ovaj projekat.
- (2) Maksimalan iznos novčane podrške koji se može doznačiti kandidatu po ovom Pravilniku iznosi 2.000,00 KM.

IV ZAVRŠNE ODREDBE

Član 9.

Ovaj Pravilnik stupa na snagu narednog dana od dana objave na Oglasnoj ploči i web stranici Općine Vogošća.

**OPĆINSKI NAČELNIK
Migdad Hasanović**

Broj: 03-20-1304 /26
Vogošća, 16.06.2026. godine

Obrazloženje

I Pravni osnov

Pravni osnov za donošenje ove Pravilnika je:

- član 15. Zakona o principima lokalne samouprave u Federaciji Bosne i Hercegovine ("Službene novine Federacije Bosne i Hercegovine", br.49/06 i 51/09)
- 71. i 125. Statuta Općine Vogošća – („Službene novine Kantona Sarajevo“, broj 27/14 – Prečišćeni tekst i 14/15, 9/20 i 23/24) kojim je određena nadležnost Općinskog načelnika za donošenje pojedinačnih i općih akata iz samoupravnog djelokruga općine.
- Odluka o načinu primjene smjernica o minimalnim standardima dodjele budžetskih sredstava putem transfera i subvencija u Federaciji Bosne i Hercegovine broj: 02-02-575/25 od 15.04.2025. godine .

II Razlozi donošenja

Poljoprivredna proizvodnja predstavlja jednu od ključnih privrednih grana koja osigurava prehrambenu sigurnost, doprinosi ekonomskom razvoju i očuvanju ruralnih područja. Međutim, poljoprivredni proizvođači se suočavaju sa brojnim izazovima, uključujući visoke troškove proizvodnje, promjenjive vremenske uslove, ograničen pristup finansijskim sredstvima i oscilacijama u tržišnim vrijednostima.

S ciljem unapređenja poljoprivredne proizvodnje, podrške poljoprivrednicima i povećanja domaće proizvodnje hrane pristupilo se izradi ovog Pravilnika.

III Obrazloženje predloženih rješenja

- Član 1. definiše predmet regulisanja Pravilnika;
- Članom 2. definiše namjenu korištenja;
- Član 3. utvrđuje rodno značenje izraza;
- Član 4. propisuje uslove za ostvarivanje prava.
- Član 5. Propisuje obavezu raspisivanja javnog poziva;
- Član 6. definiše potrebnu dokumentaciju;
- Član 7. Definiše način provođenja postupka;
- Članom 8. Definiše iznose sredstva;
- Članom 9. utvrđuje način stupanja na snagu ovog Pravilnika:

III Finansijska sredstva

Sredstva za sufinansiranje kupovine novih plastenika obezbijedit će se u Budžetu Općine Vogošća.

Akt pripremila:

Razija Sipović _____

Akt kontrolisala:

Jsmina Fazlić _____

Akt odobrila:

Jasmina Fazlić _____